



Broj:  
Sarajevo, \_\_. \_\_. 2018. godine

Na osnovu člana 26. stav 1. tačka 2. i člana 74. stav 1. Statuta Grada Sarajeva („Službene novine Kantona Sarajevo”, broj 34/08 – Prečišćeni tekst), Gradsko vijeće Grada Sarajeva, na 14. sjednici održanoj 28.03.2018. godine, usvojilo je

Izveštaj o provođenju Odluke o utvrđivanju sportskih manifestacija od značaja za Grad Sarajevo u 2017. godini.

**PREDSJEDAVAJUĆI GRADSKOG VIJEĆA**

**Igor dr. Gavrić**

---

BOSNA I HERCEGOVINA  
Federacija Bosne i Hercegovine  
KANTON SARAJEVO  
GRAD SARAJEVO  
**GRADONAČELNIK**

---



**Grad Sarajevo**  
**City of Sarajevo**

---

BOSNIA AND HERZEGOVINA  
Federation of Bosnia and Herzegovina  
CANTON OF SARAJEVO  
CITY OF SARAJEVO  
**MAYOR**

---

**IZVJEŠTAJ**  
**O PROVOĐENJU ODLUKE O UTVRĐIVANJU SPORTSKIH**  
**MANIFESTACIJA OD ZNAČAJA ZA GRAD SARAJEVO**  
**U 2017. GODINI**

**PREDLAGAČ:**  
**Gradonačelnik**

**OBRAĐIVAČ:**  
**Gradska služba za obrazovanje,**  
**kulturu, sport i mlade**

**Sarajevo, mart 2018. godine**

---

**Adresa:** Hamdije Kreševljakovića 3, 71000 Sarajevo, Bosna i Hercegovina  
**Tel:** +387 33 208 340, +387 33 443 050; **Fax:** +387 33 208 341  
**e-mail:** grad@sarajevo.ba; **web:** www.sarajevo.ba



**EYOF 2019**  
Sarajevo & East Sarajevo

## I UVOD

Programom rada Gradskog vijeća Grada Sarajeva za 2018. godinu, predviđeno je razmatranje Izvještaja o provođenju Odluke o utvrđivanju sportskih manifestacija od značaja za Grad Sarajevo u 2017. godini.

## II NAČIN FINANSIRANJA MANIFESTACIJA OD ZNAČAJA ZA GRAD SARAJEVO

Gradsko vijeće Grada Sarajeva donijelo je Odluku o utvrđivanju sportskih manifestacija od značaja za Grad Sarajevo („Službene novine Kantona Sarajevo“, broj 6/10).

Istom su utvrđene sljedeće manifestacije od značaja za Grad Sarajevo:

1. Međunarodni memorijalni turnir u streljaštvu Sarajevo Open Amir Đulić-Špico,
2. Međunarodni velemaštorski šahovski super turnir „Bosna“ Sarajevo,
3. Memorijalni karate turnir „Salih Salko Ćurić“,
4. Međunarodni teniski turnir ATP Challenger Sarajevo Open,
5. Međunarodni teniski turnir za juniorke i juniore do 16 godina „Open RCT Barcelona 1899.“ Sarajevo,
6. Međunarodni turnir u sjedećoj odbojci, Odbojkaški klub invalida „Fantomi“ Sarajevo,
7. Međunarodni memorijalni košarkaški turnir „Mirza Delibašić“,
8. Međunarodni memorijalni turnir u stonom tenisu „Kemo Fazlić“,
9. Međunarodni memorijalni turnir u dizanju tegova „Andrija Maleč“,
10. Novogodišnji turnir u malom nogometu „Asim Ferhatović Hase“,
11. Bajramski malonogometni turnir,
12. Međunarodni božićni malonogometni turnir „SAŠK Napredak“,
13. Međunarodni juniorski miting u atletici Sarajevo,
14. Manifestacija „Svi na snijeg“
15. Međunarodno skijaško takmičenje FIS Kup „Djeca za mir u svijetu“
16. Međunarodni turnir u hokeju na ledu „Sarajevo kids“
17. FIS takmičenje u snowboardu FIS kup Sarajevo,
18. Međunarodno takmičenje u umjetničkom klizanju „Sarajevo Open“,
19. Međunarodni memorijalni turnir u boksu „Hakija Turajlić“,
20. Evropski judo kup „Top ranking Sarajevo Open“
21. Međunarodni judo turnir „Vinko Šamarlić“,
22. Međunarodni plivački miting „Dan grada Sarajeva“,
23. Vaterpolo turnir povodom 6. aprila Dana grada Sarajeva
24. Međunarodni memorijalni turnir u malom nogometu „Zajko-Šikalo“
25. Međunarodni turnir u hrvanju
26. Šestoaprilski turnir u kuglanju za slijepe i slabovidne osobe,
27. Šestoaprilski turnir u streljaštvu
28. Međunarodni košarkaški turnir za djevojčice i dječake povodom Dana Grada Sarajeva
29. Međunarodni karate turnir „Euro Karate Grand Prix Sarajevo“

Odlukom o utvrđivanju sportskih manifestacija od značaja za Grad Sarajevo definisani su opći i posebni kriteriji, kao i procedura za finansiranje navedenih manifestacija. Organizatori manifestacija su dužni podnijeti gradonačelniku Grada Sarajeva putem Gradske službe za obrazovanje, kulturu, sport i mlade zahtjev za sufinansiranje manifestacije. Ovaj zahtjev mora sadržavati detaljan i

obrazložen program sa svim aktivnostima, planiranu finansijsku konstrukciju programa, kao i kompletnu dokumentaciju kojom se dokazuje ispunjenje općih i posebnih kriterija, najkasnije do kraja septembra tekuće godine, kako bi se mogla planirati sredstva u Budžetu Grada Sarajeva za narednu godinu.

Gradska služba za obrazovanje, kulturu, sport i mlade procjenjuje programe manifestacija sa stanovišta značaja za Grad Sarajevo i na osnovu općih i posebnih kriterija za finansiranje manifestacija, te shodno kvaliteti programa svoje stavove sa obrazloženim prijedlogom visine iznosa sredstava neophodnih za realizaciju dostavlja gradonačelniku Grada Sarajeva na daljnji postupak.

Gradonačelnik Grada Sarajeva se obavezuje da sa organizatorima manifestacija zaključi ugovor kojim će se regulisati međusobna prava i obaveze.

Organizatori su dužni po završetku manifestacije dostaviti gradonačelniku Grada Sarajeva izvještaj o namjenskom utrošku sredstava shodno Odluci o izvršavanju Budžeta Grada Sarajeva.

### **III KRATAK OPIS SPORTSKIH MANIFESTACIJA OD ZNAČAJA ZA GRAD KOJI SU FINANSIRANI I REALIZOVANI U 2017. GODINI**

**U pogledu finansiranja programa iz oblasti sporta, iz skromnih budžetskih sredstava Grada Sarajeva, u 2017. godini sufinansirano je ukupno 11 sportskih manifestacija, najvećim dijelom održanih u sklopu programa obilježavanja 6. aprila – Dana grada Sarajeva:**

#### **1. X Međunarodni šestoaprilski košarkaški turnir za pionire, kadete i juniore 2017.**

Međunarodni šestoaprilski košarkaški turnir održan je od 07.-09.04.2017. godine u Sarajevu u KSC „Skenderija“, a organizator turnira je KK „Koš“ uz podršku Grada Sarajeva. Na turniru su nastupili takmičari u pionirskoj, kadetskoj i juniorskoj konkurenciji. U konkurenciji pionira (U14) učestvovali su mladi košarkaši KK „Pink Panther“, KK „Spars“ i KK „Koš“ (BiH), KK „Kvarner“ (Hrvatska). U konkurenciji kadeta (U16) nastupili su KK „Spars“ i KK „Koš“ (BiH), KK „Megabemax“ (Srbija), KK „Kvarner“ (Hrvatska), KK „GEN“ i KK „Bosna“, dok su u konkurenciji juniora (U18) nastupili KK „Spars“ i KK „Koš“ (BiH), KK „Bayern“, KK „Kvarner“ (Hrvatska), KK „Megabemax“ (Srbija), KK „Budućnost“ (Crna Gora).

U konkurenciji juniora pobjednik turnira je ekipa KK „Megabemaxa“, drugo mjesto je pripalo ekipi KK „Koš“, a treće KK „Bayern“.

U konkurenciji kadeta dominirala je ekipa KK „Spars“ koja je u finalu slavila nad KK „Koš“. Treće mjesto osvojila je ekipa KK „Megabemaxa“.

KK „Spars“ bila je najuspješnija ekipa i u pionirskoj konkurenciji u kojoj je u finalu pobijedila KK „Pink Panther“. Pioniri KK „Kvarner“ bili su treći.

#### **2. XI Međunarodni hrvački turnir za dječake i djevojčice – „Kup Grada Sarajeva 2017“**

Pod pokroviteljstvom Grada Sarajeva i tehničkom organizacijom Hrvackog kluba „Bosna“, u Olimpijskoj dvorani „J.A. Samaranch“, od 07.-08.04.2017. godine, održan je hrvački turnir na kojem je učestvovala 21 ekipa i preko 100 takmičara iz Bugarske, Mađarske, Srbije, Slovenije, Crne Gore, Hrvatske i BiH.

Najviše uspjeha na turniru imali su hrvači HK „Bosna“, a kod inostranih ekipa reprezentacija grada Beograda.

Najuspješniji domaći takmičar bio je Hamza Komar (HK Bosna).

### **3. XVI Međunarodni plivački miting – „Sarajevu s ljubavlju 2017“**

Povodom obilježavanja 6. aprila – Dana grada Sarajeva, Plivački klub „Bosna“ uz podršku Grada Sarajeva, po 16-ti put je organizirao tradicionalni međunarodni plivački miting pod nazivom „Sarajevu s ljubavlju“. Takmičenje je održano na Olimpijskom bazenu Otoka, od 02.-03.04.2017. godine. Na Mitingu je nastupilo 26 klubova sa 382 takmičara iz Hrvatske, Turske, Crne Gore, Kosova i BiH.

Na takmičenju je realizirano 1274 starta, te oboreno devet državnih rekorda, a samo takmičenje je bilo certificirano od Međunarodne plivačke federacije (FINA) i realizovano na najvišem organizacionom i tehničkom nivou.

### **4. IX Međunarodni kuglaški turnir za slijepe 2017.**

U organizaciji Sportskog društva slijepih i slabovidnih Kantona Sarajevo, a povodom obilježavanja 6. aprila - Dana grada Sarajeva, u Olimpijskoj dvorani „J.A. Samaranch“ 08.04.2017. godine održan je tradicionalni međunarodni kuglaški turnir za slijepe osobe. Uz učešće 64 takmičara iz Njemačke, Slovenije, Hrvatske, Srbije i Bosne i Hercegovine ovo je bio najmasovniji kuglaški turnir za slijepe osobe 2017. godine u Evropi. Ekipni pobjednik turnira je ekipa SKS „Zagreb“ ispred drugoplasirane ekipe „Karel Jeraj“ iz Ljubljane te trećeplasirane ekipe ŠUS „Svjetlost“ iz Osijeka. Najuspješnije takmičarke iz BiH na ovom turniru bile su takmičarke iz Sarajeva Ivana Bojić i Emina Zahirović koje su osvojile treća mjesta u svojim kategorijama.

### **5. X Međunarodni šestoaprilski turnir u streljaštvu 2017**

Na 10. Međunarodnom šestoaprilskom turniru, koji je u organizaciji Streljačkog kluba „Sarajevo“, održan od 08. do 09. aprila 2017. godine na strelištu „Zetra“, učestvovalo je 16 klubova iz Slovenije, Hrvatske, Crne Gore te Bosne i Hercegovine što je rekordan broj klubova do sada.

Takmičenje je organizovano po olimpijskim ISSF pravilima uz gađanje na elektronske mete i finalna gađanja za osam prvoplasiranih takmičara. Gađalo se vazdušnom puškom u pojedinačnoj i ekipnoj konkurenciji za seniore i seniorke. Ekipni pobjednik u disciplini žene – puška je SK „Sarajevo“, drugoplasirana ekipa SD „Kovinar“ SLO, a treće mjesto pripalo je juniorkama SK „Sarajevo“.

Pojedinačni pobjednik u ovoj disciplini bila je Lia Lazar SD „IX Korpusa (SLO), ispred Urške Kuharić SD „Kovinar“ (SLO) i trećeplasirane Danijele Vukadin SD „Dalmacijacement“ (CRO).

Ekipni pobjednik kod muškaraca – puška je ekipa SD „Dalmacijacement“ Solin (CRO), drugoplasirana ekipa je SS Berane (MNE), a treće mjesto pripalo je ekipi SK „Sarajevo“.

Pojedinačni pobjednik u muškoj konkurenciji je Borna Petanjek SD „Dalmacijacement“ (CRO), ispred klupskog kolege Marina Čerine i trećeplasiranog Maj Kadunca SD „Trzin“ (SLO).

Zbog organizacije po najvišim standardima takmičenje se nalazi u kalendarima Svjetske sportske streljačke federacije (ISSF) i Evropske streljačke konfederacije (ESC).

### **6. XVIII Karate kup Oslobođenja – Memorijal Salko Ćurić 2017**

U organizaciji Karate kluba „Salko Ćurić“, 02. aprila u KSC „Skenderija“ održan je tradicionalni turnir, na kojem je učešće uzelo preko 200 učesnika iz 22 kluba iz Slovenije, Hrvatske, Crne Gore te Bosne i Hercegovine. Na turniru su učestvovali karatisti svih generacija te značajno doprinosi razvoju karate sporta.

U ženskoj konkurenciji takmičenje je održano u katama, a prvo mjesto osvojila je Biserka Radulović (KK Budućnost, Podgorica), druga je bila Mia Roganović (KK Budućnost, Podgorica), dok je treće mjesto osvojila Alma Suhonić (KK Okinawa, Sarajevo). Pobjednik kod seniora u borbama je Admir Dautović (KK Novi Grad, Sarajevo), drugo mjesto zauzeo je Edin Sarić (KK Champion, Ilidža), dok je treće mjesto osvojio Denis Gogić (KK Novi Grad, Sarajevo).

## **7. XXIV Memorijalni turnir u malom nogometu „Smail Šikalo“**

U organizaciji Omladinskog fudbalskog kluba „Biser 96“, na sportskom terenu „Braća Kadić“ u Boljakovom Potoku, od 28. juna do 2. jula, održan je 24. Memorijalni turnir u malom nogometu „Smail Šikalo“.

Na ovogodišnjem turniru učešće je uzelo 48 ekipa, 16 seniorskih selekcija, 16 selekcija veterana i 16 ekipa omladinskog pogona, koji su se takmičili u četiri kategorije.

U selekciji veterana najbolja je bila ekipa OFK „Biser 96“, koja je u finalu savladala ekipu „City Park“ rezultatom 4:2, trećeplasirana je ekipa „Senigor“, koja je u borbi za treće mjesto savladala ekipu NK „Bojnik“ rezultatom 3:1.

OFK „Biser 96“ pobjednik je turnira u selekciji seniora koji su u finalu savladali ekipu MZ „Alipašin Most I“ rezultatom 6:1, dok je trećeplasirana ekipa „Zrak d.d.“ u borbi za treće mjesto savladala ekipu „Senigor“ rezultatom 4:3.

Najboljim golmanom turnira proglašen je Selmir Peljto (OFK „Biser 96“), najbolji strijelac je Almir Čardaklija (OFK „Biser 96“), dok je najbolji igrač Alen Suljević (MZ „Alipašin Most I“).

Osim takmičarskih utakmica odigrana je i revijalna utakmica između ekipa veterana Starog Grada i veterana Novog Grada sa konačnim rezultatom 0:2.

## **8. XXVI Bajramski turnir u malom nogometu**

U KSC „Skenderija“ 02.09.2017. godine u organizaciji FK i KMF „Vrbanjuša“ održan je 26. Bajramski malonogometni turnir. Na ovom turniru nastupile su četiri seniorske ekipe Sarajevo, Željezničar, Olimpik i Vrbanjuša, te nekoliko škola fudbala.

## **9. XIII Memorijalni košarkaški turnir „Mirza Delibašić“**

Memorijalni turnir „Mirza Delibašić“, 13. po redu, održan je 9. i 10. 09.2017. u KSC Skenderija u organizaciji KK „Bosna Royal“.

U čast legendarnom košarkašu, na turniru su učestvovala ekipe KK „Budućnost VOLI“ iz Podgorice, OKK „Sloboda“ Tuzla, KK „Krka“ iz Novog Mesta, te domaćin manifestacije KK „Bosna Royal“.

Košarkaši Budućnosti pobjednici su turnira „Mirza Delibašić“, a u finalnom dvoboju slavili su protiv slovenačke Krke rezultatom 88:64. Košarkaši „Bosna Royal“ u utakmici za treće mjesto bili su bolji od tuzlanske „Slobode“.

## **10. Međunarodni karate turnir „Karate World Grand Prix Alija Izetbegović 2017.“**

Univerzitetski karate klub „Bosna“ je 22.04.2017. godine u Olimpijskoj dvorani „J.A. Samaranch“ organizirao Međunarodni turnir „Karate World Grand Prix Sarajevo – Alija Izetbegović“.

Na turniru je učestvovalo više od 1.000 takmičara i takmičarki u kategorijama djece, kadeta, juniora i seniora iz 76 klubova, kao i tri reprezentacije – Makedonije, Crne Gore i BiH, koje su se pripremale za nastupe na Evropskom prvenstvu.

Plasman klubova: KK „Champion“ Ilidža, KK „Regeneracija“ Velika Kladuša, KK „Okinawa“ Sarajevo.

## **11. IX Vaterpolo turnir evropskih šampiona „Sarajevo Champions Challenge 2017“**

JP „Olimpijski bazen Otoka“ d.o.o. Sarajevo i Vaterpolo savez Kantona Sarajevo su 8.-10.09.2017. godine organizovali 9. Međunarodni vaterpolo turnir „Sarajevo Champions Challenge 2017“. Na turniru su nastupile četiri ekipe POŠK (Split), Primorac (Kotor), Vojvodina (Novi Sad) i reprezentacija BiH.

Pobjednik turnira je ekipa POŠK-a iz Splita.

#### IV FINANSIRANJE OD STRANE GRADA SARAJEVA U 2017. GODINI

U segmentu podrške sportskim manifestacijama od interesa za Grad, kao i obilježavanju 6. aprila Dana grada Sarajeva, a nakon provedene procedure, u 2017. godini sufinansirani su sljedeći projekti:

Red. br.	APLIKANT	NAZIV PROJEKTA	IZNOS KM
1.	Košarkaški klub „Koš“	10. Međunarodni turnir u košarci za djevojčice i dječake	12.000,00
2.	Hrvački klub „Bosna“	11. Šestoaprilski turnir u hrvanju „KUP grada Sarajeva“	2.900,00
3.	Plivački klub „Bosna“	16. Međunarodni plivački miting „Sarajevu s ljubavlju 2017“	5.100,00
4.	Sportsko društvo slijepih i slabovidnih KS	9. Međunarodni kuglaški turnir za slijepce 2017.	4.000,00
5.	Streljački klub „Sarajevo“	10. Međunarodni šestoaprilski turnir u streljaštvu	2.000,00
6.	Karate klub „Salih Salko Ćurić“	18. karate takmičenje „Karate Kup oslobođenja – Memorijal Salko Ćurić“	2.000,00
7.	Omladinski fudbalski klub „Biser 96“	24. Međunarodni memorijalni turnir u malom nogometu „Zajko-Šikalo 2017.“	3.000,00
8.	FK i KMF „Vrbanjuša“	26. Bajramski turnir u malom nogometu	1.000,00
9.	KK „Bosna Royal“	13. Memorijalni košarkaški turnir „Mirza Delibašić“	5.000,00
10.	Univerzitetski karate klub „Bosna“	Međunarodni karate turnir „Karate World Grand Prix Alija Izetbegović 2017.“	2.000,00
11.	JP „Olimpijski bazen Otoka“ i Vaterpolo savez KS	9. Vaterpolo turnir evropskih šampiona „Sarajevo Champions Challenge 2017“	6.600,00

U 2017. godini za primjenu Odluke o finansiranju sportskih manifestacija od interesa za Grad bio je predviđen iznos od 15.000,00 KM, što je bilo nedovoljno, te su neke manifestacije podržane sa pozicije za pokroviteljstvo i sredstava namijenjenih za Dane grada Sarajeva.

Organizatori podržanih manifestacija u 2017. godini dostavili su finansijske i narativne izvještaje sa informacijama o načinu utroška dodijeljenih finansijskih sredstava, kao i o posjećenosti i postignutim rezultatima na takmičenjima. Dostavljene informacije su najbolji pokazatelji da su manifestacije koje sufinansira Grad Sarajevo vrhunske kvalitete, te da okupljaju mnogobrojne sportiste iz BiH i Evrope i sve veći broj posjetilaca. Nažalost, zbog limitiranih sredstava na ovoj budžetskoj poziciji Grad Sarajevo nije bio u mogućnosti da finansira i ostale sportske manifestacije od značaja za Grad.

## V REZIME

1. Grad Sarajevo je u 2017. godini provodeći Odluku o utvrđivanju sportskih manifestacija od značaja za Grad, prvenstveno činio napore da uravnoteženo, a u skladu sa realnim materijalnim mogućnostima, podrži sve segmente sporta. Nažalost, zbog limitiranih sredstava, Grad Sarajevo je bio u mogućnosti finansirati ograničen broj manifestacija.
2. Provodeći Odluku o utvrđivanju sportskih manifestacija od značaja za Grad ipak smo uspjeli sačuvati kontinuitet održavanja određenog broja programskih sadržaja u okviru navedenih manifestacija, posebno onih koje se organiziraju u povodu 6. aprila – Dana grada Sarajeva.
3. Grad Sarajevo provodeći Odluku o utvrđivanju sportskih manifestacijama od značaja omogućuje da veliki broj građana našeg grada, a posebno djece i mladih u toku cijele godine prati i neposredni je sudionik različitih međunarodnih sportskih sadržaja koje iz godine u godinu dobivaju na masovnosti i kvaliteti. Grad Sarajevo, kao olimpijski i sportski grad, će i ubuduće ulagati napore za razvoj sporta pružajući podršku raznim sportskim sadržajima te na taj način animirati građane, posebno djecu i mlade, da prate programe sportskih manifestacija, i da se i sami uključe u rad sportskih društava.